

ՅՈՐԵԼԵԱՆՆԵՐ

ՆԱՀԱՊԵՏՐ՝ ՂԵՒՈՆԴ ԱԼԻՇԱՆ

(Ծննդեան 200-ամեակի առթիվ)

Ղեւոնդ Ալիշանը 90-ականների մեր սերունդի համար ամենահմայիչ անունն էր. նրա՝ Նահապետի սքանչելի բանաստեղծութիւններն ու երգերը՝ «Պլպուլն Աւարայրի», «Հայոց աշխարհի՛կ, գարունդ է եկել...», «Բա՛մ փորոտան», մենք անգիր գիտէինք, մեր դասագրքերի զարդն էին նրանք, ոգեւորուած արտասանում ու երգում էինք հանդէսներում:

Նրա ամբողջ կեանքը ճգնութեան խնկարան եւ դպրութեան թանգարան է եղել: Աւելի քան վաթսուն տարի տեւող իր գիտական գործունէութեան ընթացքում Ալիշանը, ըստ երեւոյթին, մի քանի հազար կտոր գիրք է կարդացել, Դ. Վարուժանի պատկերաւոր արտայայտութեամբ՝ «քամել է համայն երակը տիեզերքին»¹: Հանդէս է եկել հայկական մշակութային կեանքի ամենատարբեր ասպարէզներում՝ դրսեւորելով իրեն որպէս ականաւոր բանաստեղծ ու արձակագիր, որպէս Հայաստան աշխարհի հմուտ տեղագիր-պատմաբան ու աշխարհագրագէտ, որպէս հանրագիտակ մտածող, որի գիտական, պատմական, գրական, թարգմանական ժառանգութիւնն ապշեցնում է իր հըսկայական ծաւալներով:

Անառարկելի մեծութիւն էր Ալիշանը նոյնիսկ նրանց համար, ովքեր հախուռնաբար մերժում էին Մխիթարեանների գրական վաստակն ու գաղափարաբանութիւնը: Նրանցից շատերն անգամ չեն երկմտել ամբողջ միաբանութիւնից առանձնացնելու լայնախոհ Նահապետին: Առանձնակի ջերմութեամբ ու ակնածանքով են արտայայտուել նրա մասին հայ գրականութեան հեղինակաւոր դէմքեր՝ Մ. Նալբանդեանը, Ղ. Աղայեանը, Յ. Պարոնեանը, Րաֆֆին, Յովհ. Թումանեանը, Ա. Զօպանեանը, Դ. Վարուժանը, Ա. Իսահակեանը, Ե. Չարենցը, ընդունել նրա՝ որպէս բանաստեղծի, հզօր տաղանդը:

Դեռեւս 1859 թ. Միքայէլ Նալբանդեանը «Յիշատակարանում» գրում էր, որ Ալիշանի հայրենասիրական երգերը «ջերմացուցել են շատ սրտեր Նահապետի անունի վերայ»: Դրանից մի քանի տարի անց, Պետրոպաւլովեան բանտում Նալբանդեանը՝ նկատի ունենալով «Երգ Նահապետի» շարքը, Ալիշանին հուշակում էր հայ նոր պոեզիայի հիմնադիր եւ շեշտում, թէ «չափաբերական քերթուածոց մէջ արժանաւոր վարդապետը ախոյեան չունի»², տարիներ յետոյ Ղ. Աղայեանը նոյնպէս հաւաստում է, թէ «Հայր Ղեւոնդ Ալիշանը դարուս հայկական հանճարի ներկայացուցիչն է: Իբրեւ բանաստեղծ բոլոր բանաստեղծների նահապետը»³, դրանից էլ մօտ քառասուն տարի անց, Ալիշանի մահուան առթիւ Արշակ Զօպանեանը ուղղակի յայտարարեց. «Զինքը համարինք հայոց մեծագոյն բանաստեղծը, որովհետեւ որքան ալ Աբովեան, Պէշիկթաշլեան, Դուրեան կը գերազանցեն Ալիշանը գրական այս կամ այն սեռին մէջ, ուր իրենք մասնաւոր ուժ մը ցոյց կու տան, Ալիշան զանոնք ամէնքն ալ կը գերազանցէ իր տաղանդին անհուն բազմազանութեամբը, լեզուին հարստութեամբն ու ճարպկութեամբը, տաղաչափութեան անվերջ պեսպիսութեամբը»⁴, իսկ Թումանեանը

¹ «Էջմիածին», Իլ տարի, Դեկտեմբեր, 1970-ժԲ, էջ 20:

² Նալբանդեան Մ., Հրապարակախօսական երկեր, Երևան, 1979, էջ 206-207, 441:

³ Աղայեան Ղ., Երկերի ժողովածու, հ. 3, Երևան, 1963, էջ 21:

⁴ «Անահիտ», Փարիզ, 1902, № 4, էջ 75: Նոյնը տե՛ս Զօպանեան Ա., Դիմքեր, Փարիզ, 1924, էջ 95:

պատկառանքի նույն զգացումով իր իսկ Ալիշանի չափով սգում էր «հայոց Նահապետի» կորուստը.

*Թէպէտեւ վաղուց հասել էր աշուն,
Ցամքած տերեւակն սպասել հովուն,
Թէ երբ ի լերաց ծոցում փչէ խոր,
Ձրգէ անկսկի՞ծ ի մահուն սեւ ձոր,
Այլ ես շանթահար ապշիմ վշտակոծ,
Թէ ինչպէ՞ս ընկաւ Նահապետն հայոց...⁵*

Ալիշան-բանաստեղծի գրական-պատմական դերը գնահատելով՝ գրականագետ Ս. Սարինեանը իրաւացիօրէն գրում է. «Ե՛ւ որպէս ստեղծագործող, ե՛ւ որպէս հիմնադիր մեր նորագոյն բանաստեղծութեան համար նա (իմա՝ Ալիշանը - Ն.Ա.Ա.) նույն դերը կատարեց, ինչ Աբովեանը «Վերք Հայաստանի» հայ վէպի զարգացման գործում: Ալիշանի բանաստեղծական աշխարհը իր ուրոյն երանգները տուեց հայ դասական պոեզիային: Բնութեան ընկալման փիլիսոփայական խորհումների, հայրենասիրական պաթոսի շուրջ հարստութիւնը, բանաստեղծական պատկերի լիութիւնն ու երեւակայութեան թռիչքը ոգեշնչել են ոչ միայն Պէշիկթաշլեանին ու Դուրեանին, Պատկանեանին ու Շահազիզին, այլեւ թելեր են ձգել մինչեւ Թումանեանի ու Իսահակեանի, Վարուժանի ու Սիամանթոյի պոետական մտապատկերները: Ալիշանի պոեզիան եւ աւարտ է, եւ սկիզբ⁶:

Հայր Ալիշանի մասին գերադրական գնահատականներ շատ կարելի է բերել, բայց բաւարարուենք այսքանով:

Աւագանի անունով Քերովբէ Ալիշանը ծնունդ է 1820 թուականի Յուլիսի 18-ին Կ. Պոլսում, գրամագէտ-հնահաւաք Պետրոս Մարգարի Ալիշանի ընտանիքում: Տասներկու տարեկան հասակում, 1832 թուականին, հայրը նրան ուղարկում է Վենետիկի Ս. Ղազար վանքի դպրոցը («Ընծայարան»), ուր հինգ տարի ուսանելուց յետոյ, փոխադրւում է տեղի «Բարձրագոյն կրթարանը»: Այստեղ էլ Ալիշանը սկսում է գրական իր առաջին փորձերը⁷: 1838 թ. Յունուարի 28-ին կրօնական մեծ հանդիսաւորութեամբ կատարւում է իր ուխտադրութիւնը, որով դառնում է Վենետիկի Մխիթարեան միաբանութեան անդամ:

1840 թ. Յունիսի 7-ին ձեռնադրւում է կուսակրօն հոգեւորական եւ «Աւարայրի արծուի»՝ Ղեւոնդ Երէցի անունով վերակոչւում է Ղեւոնդ, որին ջանացել էր նմանուել ոչ միայն անուամբ այլեւ սրտով ու հոգով: Ձեռնադրութիւնից յետոյ, 1841 թ.-ին, դեռեւս 21 տարեկան երիտասարդ հասակում նշանակւում է ուսուցիչ Վենետիկի Ռափայէլեան վարժարանում: Այնուհետեւ, 1843 թուականից սկսած, նա, մանկավարժական գործունէութեանը զուգընթաց, երբ հիմնադրւում է Վենետիկի Մխիթարեան միաբանութեան պաշտօնական ամսագիր «Բազմավէպ»-ը՝ աշխատակցում, իսկ 1849-1852 թուականներին նաեւ խմբագրում է այդ հանդէսը:

1848 թ.-ին նշանակւում է Ռափայէլեան վարժարանի տեսուչ: 1850-1853 թուականներին զանազան առիթներով լինում է Հռոմում, Լոնդոնում, Փարիզում, Բեռլինում, Վիեննայում, ուր ուսումնասիրում է հայկական գրչագիր մատեանները, հոգեւոր մշակութային յուշարձանները, նիւթեր է հաւաքում հայագիտական իր ուսումնասիրութիւնների համար: Այդ ընթացքում բնագրից թարգմանում է Բայրենի «Չայլդ Հարոլդ»

⁵ Սարինեան Ս., Հայկական ումանթիզմ, Երեւան, 1966, էջ 212:

⁶ Նույն տեղում, էջ 213:

⁷ Հայ նոր գրականութեան պատմութիւն, հ. 1, Երեւան, 1962, էջ 478-479:

պոեմի չորրորդ երգը եւ գրում է մի շարք բանաստեղծութիւններ⁸:

1858-1861 թուականներին Ալիշանը վարում է Փարիզի Մուրատեան վարժարանի տեսչի պաշտօնը: Այնուհետեւ, 1861 թ. Նոյեմբերին վերադառնում է Վենետիկ եւ 1866 թ.-ին վերստին ստանձնում է Ռափայէլեան վարժարանի տեսչի պաշտօնը՝ մինչեւ 1872 թ.⁹:

1876 թ.-ին վախճանում է Մխիթարեան միաբանութեան արքայայր Գէորգ Հուրմուզեանը եւ, ինչպէս վկայում է ժամանակակիցներից Մ. Շովրեանը, «Բոլորի աչքը հառում է դէպի Ալիշանը, սակայն համեստագոյն Ալիշանը», - որ խորշում էր պաշտօններից, հրաժարում է արքայայրութիւնից: Իսկ երբ Միաբանութեան անդամները սկսում են պնդել, պատմում են, որ ծերունին հանել է իր գրիչը եւ բարկացած ասել. «Եթէ դուք իսպառ կամիք կոտրել այս գրիչը, ընտրեցէք զիս»¹⁰: Միաբանութեան անդամները տեղի են տալիս՝ բաւարարուելով նրան աթոռակալի պաշտօնը պարտադրելով: Այդ քայլով Ալիշանը կարողացաւ փրկել իր վերջին քսանհինգ տարիները, որ անմնացորդ նուիրեց հայ գրականութեանն ու պատմութեանը:

Ղեւոնդ Ալիշանը ապրեց՝ ութսուներկու տարի. «Սիմէոն ծերունիին պէս պիտի ապրիմ ու պիտի սպասեմ...»¹¹, - ասել է նա Միաբանութեան քահանաներից մէկին: Եւ սպասեց նա, սպասեց երկար, սակայն, ի տարբերութիւն Սիմէոն ծերունու, որ տեսաւ Իսրայէլի փրկչին, Հայ Մեսիան չեկաւ. «Երգեց, աշխատեցաւ եւ այն Մեսիային չտեսաւ, ոգեառ ոգին ալ սպասեց՝ բայց չխաբուեցաւ...»¹²:

Ալիշանը մահացել է 1901 թ. Նոյեմբերի 22-ին: Մի պահ, ասես, մոռացուեց նրա եկեղեցական պատկանելիութիւնը: Մահախօսական յօդուածներ հրատարակեցին հայկական բոլոր լրագրերն ու ամսագրերը. «... Հ. Ալիշանը ամբողջ ազգին է պատկանում, որովհետեւ նրան սիրելու համար չպէտք է լինել լուսաւորչական, կաթոլիկ կամ բողոքական, այլ միայն հայ»¹³, - գրում էր «Մշակ»-ը եւ պահանջում, որ Ալիշանի մահուան կապակցութեամբ հոգեհանգիստ տրուի հայկական բոլոր եկեղեցիներում: Ի հարկէ հայկական բոլոր եկեղեցիներում հոգեհանգիստ չտրուեց: Յովհ. Թումանեանի եւ առաջադէմ միւս ազգային գործիչների միջամտութեամբ հոգեհանգիստ կատարուեց միայն Թիֆլիսի կաթոլիկէ եկեղեցում, բայց այդ արարողութեանը ներկայ էին ազգային բոլոր երեւելիները առանց կրօնական խտրականութեան, այդ թւում նաեւ Թիֆլիսի հայոց թեմի առաջնորդը, ինչը այն ժամանակների համար գրեթէ չլսուած բան էր¹⁴...

Ղեւոնդ Ալիշանն իր խցում ներշնչուած Մովսէս Խորենացու եւ Անանիա Շիրակացու ներկայութեամբ, անխոնջ համբերանքով եւ աւիւնով պրպտել է ողջ մատենագրութիւնը՝ պատմական եւ աշխարհագրական, արդի հայ գրականութիւնն ու մամուլը, հաւաքել է անթիւ տեղեկութիւններ Հայաստանի ամէն մի վայրի մասին՝ հին եւ նոր¹⁵ ու ստեղծել ստուարածաւալ բազմաթիւ աշխատութիւններ, ինչպէս՝ «Տեղագիր հայոց մեծաց», «Շնորհալի եւ պարագայ իւր», «Շիրակ», «Սիսուան», «Այրարատ», «Սիսական», «Հայբուսակ», «Հին հաւատք կամ հեթանոսական կրօնք հայոց», «Հայ-Վենետ», «Հայապատում» եւ այլ փոքր ու մեծ, շատ հետազօտութիւններ, որոնք փաստական հսկայական նիւթ են պարունակում հայ ժողովրդի պատմական անցեալի գրեթէ բոլոր շրջան-

⁸ Տե՛ս նոյն տեղում, էջ 479-480:

⁹ Տե՛ս «Էջմիածին», Իէ տարի, Դեկտեմբեր, 1970-ԺԲ, էջ 23:

¹⁰ Շովրեան Մ., Հ. Ալիշանի մահուան առթիւ, «Գեղունի», 1902, № 3, էջ 30:

¹¹ Երեմեան Ս., Կենսագրութիւն Հ. Ալիշանի, Վենետիկ, 1902, էջ 194:

¹² Նոյն տեղում:

¹³ «Մշակ», 1901, № 252:

¹⁴ Բանբեր Երեւանի համալսարանի, 3(105), Երեւան, 2001, էջ 206:

¹⁵ Իսահակեան Ա., Երկերի ժողովածու վեց հատորով, հ. 5, Երեւան, 1977, էջ 10:

ների եւ բնագաւառների վերաբերեալ¹⁶:

Ձափածոյ գրական ստեղծագործութիւնները գրեթէ ամբողջութեամբ ամփոփուած են «Նուագը» խորագրով լոյս տեսած հինգ հատորների մէջ, որոնք տպագրուել են Վենետիկում 1857-1858 թուականներին: Բոլոր հինգ հատորների («Մանկունի», «Մաղթունի» եւ «Բնունի», «Հայրունի», «Տէրունի», «Տխրունի»), հիմնական բովանդակութիւնը ազնուի, բարու, գեղեցկի, բարոյականի ու վեհի, հայրենասիրութեան, սխրանքի գովերգումն է: Դժբախտաբար գրաբար գրուած լինելով հինգ հատորները չմարսուեցին: Սակայն այս շարքում բացառիկ է երրորդ՝ «Հայրունի» վերտառութեամբ հատորը, ուր գրաբար գրուած պատմա-հայրենասիրական բովանդակութեամբ ստեղծագործութիւնների հետ մէկտեղ գտնուած ենք աշխարհաբարով գրուած 11 բանաստեղծութիւններ («Հայոց աշխարհիկ», «Պլպուլն Աւարայրի», «Ողբամ գքեզ, Հայոց աշխարհ», «Հրագդան», «Մասիսու սարերն», «Շուշանն Շաւարշանայ», «Աշոտ Երկաթ ի ծովուն Սեւանայ», «Լուսնկայն գերեզմանաց հայոց», «Հայ հայրենիք», «Հայ հանճար», «Վերջին երգ վիրաւոր բամբուհարին»), որոնք կրում էին ոչ թէ Ալիշանի սովորական ստորագրութիւններից որեւէ մէկը, այլ խորհրդաւոր եւ խորհրդանշական, ինքնին հնութեան եւ ծերութեան շունչ հաղորդող «Նահապետ» անունը: Հէնց այս, աշխարհաբարով գրուած 11 բանաստեղծութիւններով էլ առաւելապէս յայտնի է բանաստեղծ Ալիշանը:

Ինչո՞ւ է Ալիշանը իր բանաստեղծական գրչի ամէնից տաղանդաւոր եւ նշանակալից էջերը վերագրել իրականում գոյութիւն չունեցած «Նահապետ» երգչին: Այս հարցին գրականագիտութեան մէջ տարբեր պատասխաններ են տրուել, բայց հիմնականը համարուել է այն, որ դեռ երիտասարդ հասակում Ալիշանը ցանկացել է հանդէս գալ ծերունի, կենսափորձով հարուստ բանաստեղծի դերում, որը նրան իրաւունք կը տար հայրենասիրութեան դասեր կարդալու նոր սերնդին: Դեռեւս Մ. Նալպանտեանը, Ալիշանին անձամբ հանդիպելուց եւ ճանաչելուց յետոյ գրում էր, թէ «շատ երիտասարդ կը կացուցանէ մեզ ծերունի Նահապետը...», եթէ իւր այսուհետեւ երգելիքը երգէ աւելի հասկնալի (հասարակ ժողովրդի համար) լեզուով¹⁷: Այդ ժամանակ՝ 1859 թ.-ին Ալիշանը քառասուն տարեկան էլ չկար:

Արսէն Տէրտէրեանը շատ յստակ եւ որոշակի բացատրութիւն է տուել գրելով. «Նահապետը դեռ քառասուն տարին չէր բոլորել, երբ գրում էր իր քերթուածները. բայց նա իրեն «ծեր» է համարում, ծեր ո՛չ եռանդի, աշխոյժի եւ գործունէութեան կրակի իմաստով, այլ իր փորձառութեամբ, աշխարհածանօթութեամբ եւ գիտութեամբ, որոնցով նա ուզում էր մենտոր հանդիսանար նոր սերնդի, երիտասարդութեան, հայկակների համար»¹⁸:

Հիանալի իմանալով նահապետ բառի իմաստները՝ Ղեւոնդ Ալիշանը «Հայոց աշխարհիկ» բանաստեղծության մէջ շեշտում է Ստ. Մալխասեանցի «Հայերէնի բացատրական բառարանի» երրորդ հատորում բացատրուած նահապետ բառի վերջին՝ «ծերունագարդ մարդ» արտայայտութիւնը: Բանաստեղծութիւնն աւարտուած է հետեւեալ տողերով.

**Ծեր Նահապետիդ՝ քոյր կակուղ հողիկ,
Որ գրեզ պինդ սիրեց, Հայոց աշխարհիկ¹⁹:**

¹⁶ Հայ նոր գրականութեան պատմութիւն, հ. 1, Երեւան, 1962, էջ 480:

¹⁷ Բանբեր Երեւանի համալսարանի, 2(47), Երեւան, 1982, էջ 26-27: Նաեւ Նալպանտեան Մ., Հրապարակախօսական երկեր, Երեւան, 1979, էջ 207:

¹⁸ Տէրտէրեան Ա., Հայ կլասիկներ, Երեւան, 1944, էջ 75:

¹⁹ Ալիշանեան Մ. Ղ., Նուագ, Վենետիկ, 1867, էջ 274: (Այսուհետեւ սոյն աղբիւրից մէջբերուող հատուածների էջերը կը տրուեն տեխնիկական փակագծերի մէջ):

Այս տողերն Ալիշանը գրել է, երբ ընդամենը քսանեօթ տարեկան էր ու երիտասարդութեան ծաղկուն հասակում իրեն կոչել է ծեր: Նա քաջ գիտէր, որ անտիկ աշխարհում եւ հայ աւանդական սովորութեամբ ծերերը խրատում էին մանուկներին՝ կեանքի ուղին ճիշդ ընտրելու համար, այդ իսկ պատճառով էլ ընտրել էր նման գրական անուն, որով էլ փորձում էր շեփոր հնչեցնել, արթնացնել հային՝ ազգային արժանապատուութիւն ներարկել նրան, ինքնիշխան լինելու գերագոյն հաճոյքը զգալ տալ նրան՝ կարծելով կը զարթնի հայը հայի մէջ... Յորդորում էր. «Ճանաչել եւ պահել անվթար զսեփական շնորհս ազգիս, զլեզուս նորա, զպատմութիւն նորա, զսովորութիւն եւ զխորթակա նորա անվնաս, զհարազատ դպրութիւն նորա եւ զփառս անուան նորա: Զայսպիսի կամիմ հայրենասիրութիւն»²⁰:

Այս շարքի բանաստեղծութիւնների հիմնական առանձնայատկութիւնը լաւատեսութիւնն է հայոց ապագայի նկատմամբ, որ բացառիկ ոռմանթիզմով արտայայտուած է «Մասիսու սարերն» բանաստեղծութեան մէջ: Ի՛նչ մեծ ազգազգացողութիւն պէտք է ունենայ մարդ, որ հայրենիքից հեռու, կղզում «պարփակուած», Արարատը համարի հայոց վերածննդի պատուանդանը եւ մանուկ սերնդին ներշնչի ազգային արժանապատուութեան զգացում, ինքնավստահութիւն, լաւատեսութիւն.

*«Դաւա՛ր մանկտիք, ձեր տակն է Արարատ,
Պի՛նդ կացէք...»:* (էջ 289)

Ալիշանի սիրտը մշտապէս լցուած էր Աստծու եւ ազգի հանդէպ ունեցած սիրոյ մեծ զգացումներով: Նախահայրերի՝ իրեն թողած բոլոր հաւատալիքները, գրոյցները, Աստծոյ, աշխարհի, կեանքի եւ հայոց պատմութեան մասին պապենական աւանդութիւնների տուած գաղափարները անվիճելի ու միակ իրականութիւնն էին նրա համար: Վերջնական ճշմարտութիւններ էին նրա աչքին հայ պատմագիրների ու քրոնիկագիրների բոլոր աշխատութիւնները, գերագոյն գրքերը՝ Աստուածաշունչն ու Խորենացին՝ լուսաբանող, պատկերազարդող, երգաբանող: Ըստ նրա, այդ երկու գրքերի ամէն մի էջը սրբազան, ամէն մի բառը յաւիտենական ու ճիշդ էր: Ա. Զօպանեանի վկայութեամբ «կը տառապէր», երբ տեսնում էր եւրոպացի կամ հայ քննադատները քայքայում էին Խորենացու կառուցած շէնքը²¹:

Հայաստանը նրա համար աշխարհի կենտրոնն էր, օրհնեալ «բնագաւառն», ուր Աստուած բնակեցրեց առաջին մարդուն, Հայկի նախահօրը՝ Ադամին, որ արդէն Հայ էր, եւ խօսում էր մի լեզու, որը հայերէնի նախահայրն էր.

*Մեր տէրն ի յերկնոց ծայրէն երբ իջաւ,
Երկրիս հիման քարն յԱրարատ դրաւ.
... Ի Հայոց հողէն կազմեցաւ Ադամ,
Զօդն Հայոց Եւան ծրծեց քաղցրահամ.
... Այս սէր սարերու ծերուկ արձագանք
Աստուծոյ ձայնին տրոխն պարասխանք:* (էջ 270)

Աւելին՝ վստահ էր, որ հէնց Հայաստանում է եղել աստուածային դրախտը, Արարատի վրայ է կանգ առել Նոյի տապանը, ու, որ հայերը Նոյի հարազատ զաւակներն են.

*Երբ գոռաց երկինքն ու գետին սարսեց
Ամպերն ի ծով, ծովն ի յամպեր վազեց,*

²⁰ «Բազմավէպ», 1848, № 12, էջ 181:

²¹ Տե՛ս Զօպանեան Ա., Դէմքեր, Փարիզ, 1924, էջ 85-86:

*Այն սարին ծայրէն Նոյ մըտաւ ի տապան
Ջրագունդ երկրիս շուրջն եկաւ մանուսան²²,
Իջաւ բազմեցաւ ի բարձրն Մասիս
Ջաղու աղանին դրկեց աւերիս.
Երկիրս էր դարպակ անապատ ահեղ,
Լուկ ի Հայաստան կար մարդկութեան տեղ: (էջ 271)*

Յենուելով Մովսէս Խորենացու «Հայոց պատմութեան» վրայ՝ Ալիշանը իր գրուածքներում յիշատակում է Հայկին, որ «փառք որդւոցն տուաւ ազատութիւն աշխարհի», անպարտելի թագաւորներ Արամին, Տիգրանին, որ «հսկայից յաղթեցին», «Լեւոնանման կտրիճներն ի ձորն Հայոց թափեցին», ինչպէս նաեւ «մեծն հսկայից եւ թագաւորաց» Տրդատին²³: Նշում է նաեւ, որ հայոց Աբգար թագաւորը նամակագրութեան մէջ է եղել Յիսուս Քրիստոսի հետ, որ Հայաստանում են գտնուում Յիսուսի կողաբաց գեղարդը եւ քրիստոնէական եկեղեցու հետ կապուած այլ նշխարներ ու մասունքներ²⁴: Հայաստանում կառուցուել են բազմաթիւ տաճարներ ու եկեղեցիներ, մեր երկրի երիտասարդները կրթուել են հին աշխարհի նշանաւոր կրթարաններում, թարգմանել այլ լեզուներից բազում գրքեր, շարադրել են նաեւ մեծաքանակ մատեաններ:

*Շատ գորքունք գրեր մեր հարքն ու մագդալա
Ջէյր ցորեն դիզել, քանց բարձր Արարաւ: (էջ 273)*

Հայաստանի պատմական ընթացքը խաթարել են չար թշնամիները, որոնք քանդել են մեր եկեղեցիները, վանքերը, գրատները, պալատները, սրածել ու գերել հայերին: Այս արհաւիրքները, ըստ Նահապետի, չեն կրկնուի, եթէ հայերն ամուր կապուեն իրենց հայրենիքին, յիշեն Արարատ լեռան անսասանութիւնը, միասնական լինեն ու թէեւ ուշացած՝ Հայոց աշխարհիկը վերստին կը տեսնի իր ազատ հայրենիքը: Սա, անշուշտ տպաւորիչ հայրենասիրական դաս է, որ հայ ժողովրդի նոր սերնդին ուսուցանում է Ղեւոնդ Ալիշանը²⁵:

Ազգն ու հայրենիքը նրա համար մշտապէս եղել են բարձրագոյն արժէքներ: Դեռեւս 23-ամեայ Ալիշանը 1843 թ.-ին Ռաֆայէլեան վարժարանի շրջանաւարտների առաջ ունեցած իր ելոյթի մէջ ասում էր. «Ով որ անտարբեր է դէպ ի հայրենիքը, ան իրաւունք չունի ընկերութեան մէջ ապրիլ, դուրս պէտք է ելել յազգես ի բնաւ իսկ մարդկանէ, յանտառս յանապատս ի սառնամանիս դիցէ զբոյն իւր»²⁶:

Իւրաքանչիւր ազգ իր երկրի, նրա բնութեան ու կլիմայի արդիւնքն է, եւ անկախ այն բանից, թէ ինչ խստաշունչ կլիմա եւ ինչ թշուառ ճակատագիր ունի այն, միշտ էլ սիրելի է իր ժողովրդի համար: Ինչպէս որ մեր ծնողներին սիրելի դարձնողը նրանց հարստութիւնը եւ փառքը կամ առողջութիւնն ու գիտութիւնը չեն, այդպէս էլ հայրենի բնութեան հարստութիւնն ու կլիման չեն կարող լինել հայրենիքի սիրոյ պատճառը:

²² Մանուսան – պտոյտ, ման գալ, շրջել: Տե՛ս Մալխասեանց Ստ., Հայերենի բացատրական բառարան, հ. 1, Երևան, 1944, էջ 255:

²³ Տե՛ս Զօպանեան Ա., Դէմքեր, Փարիզ, 1924, էջ 87:

²⁴ Աբգարը Յիսուսին գրում է. «Լսել եմ քո մասին եւ այն բժշկութիւնների մասին, որ կատարում են քո ձեռքով առանց դեղերի եւ արմատների, որովհետեւ, ինչպէս ասում են, դու կոյրերին տեսնել ես տալիս, կաղերին փայլեցնում ես, բորոտներին մաքրում ես, չար ոգիները եւ դեւերը հանում ես եւ առհասարակ երկարատեւ հիւանդութիւններով չարաւորողներին բժշկում ես, նաեւ մեռածներին կենդանացնում ես» (Տե՛ս Խորենացի Մ., Հայոց Պատմութիւն, Երևան, 1997, էջ 147-148):

²⁵ Յօդուածների ժողովածու նուիրուած Վենետիկի Ս. Ղազար կղզում Մխիթարեան միաբանութեան հաստատման 300-ամեայ յոբելեանին, Երևան, 2017, էջ 110:

²⁶ «Բազմալէպ», 1843, էջ 181:

Ի՞նչ են ասում այն մարդուն, որը չի սիրում իր ծնողներին՝ պատճառ բերելով նրանց աղքատությունը կամ խեղճությունը. «մարդ չէ, գազան է կ'ըսենք»։ Սակայն «ազգը չսիրելը, իր ծնողքը չսիրելէն վար չմնար», հետեւաբար, եթէ ծնողներին չսիրողին ասում են՝ մարդ չէ, գազան է, ապա «իր ազգը չսիրողը, իր ազգը չպատուողն ալ՝ չազգի, տմարդի բան մըն է»,- ասում է Ալիշանը։ Մենք սիրում ենք մեր ծնողներին, որովհետեւ նրանք կեանք են տուել մեզ, նոյն տրամաբանութեամբ էլ մենք պարտաւոր ենք սիրել մեր ազգը, որովհետեւ նա կեանք է տուել մեր ծնողներին. «Մեր ազգն է մեր հայրերուն հայրը, մեր ազգն է զմեզ մեզի տուողը»,- հետեւաբար՝ անիրաւ է նա, ով չի սիրում իր ազգը, եւ աւելի անիրաւ է «հայ մը, թէ որ ազգը հայ ըլլալուն համար չսիրէ»,- գրում է Ալիշանը։ Ուրեմն, եթէ «ծնողքը անիծողին լեզուն կը կտրեն, զազգը անիծողին լեզուն արմատէն խլելու է, վասնզի իր ծնողացը ծնողքն ալ կանիծէ»²⁷։

Սակայն ինչպէս հայրենասիրութեան, նոյնպէս եւ ազգասիրութեան մէջ անհրաժեշտ է լինել իրատես։ Ճշմարիտ ազգասիրութիւնը ոչ թէ ազգի թերութիւնները ծածկելն է, ազգի պակասութիւններից հրաժարուելը, այլ այդ թերութիւններն ու պակասութիւնները ժամանակին յայտնաբերելը եւ բուժման միջոցներ որոնելը։ Բայց դա չի նշանակում նաեւ «ազգը միշտ վար զարնել, անդադար պակասութիւններն յիշել, ողբալ, արհամարհել», որովհետեւ դրանով մենք կոտորում ենք մարդու սիրտը, թուլացնում, յուսահատեցնում, կատաղեցնում ենք նրան։ Հետեւաբար՝ շատ են սխալում ներքանք, ովքեր «որ ազգը կ'ուզեն շարժել յանդիմանող, կծու ձայնով, կը կարծեն, թէ փոսը ընկած է՝ մը կը վերցնեն հրելով, մշտելով, կանչուտելով, հայհոյելով, այս բանս շարժելու տեղ աւելի կը ջլատէ, կը կոտրէ ուժը, արդէն հիւանդ մարմինը աւելի կը վատուծցնէ»,- ասում է Ալիշանը։

Վնասակար է, ոչ միայն «ազգը միշտ վար զարնելը»,- պակասութիւնները յիշելը, խարանելը, այլեւ ազգը «միշտ գովելն ու գովելի ցուցնելը»,- քանի որ, եթէ առաջին դէպքում աւելի կը ջլատուի, կը կոտորուի ազգը, ապա երկրորդ դէպքում «սիրտը կ'ուռցնեն, միտքը կը կուրացնեն, սնապարծ ազգասէր մը կ'ընեն, օդու մէջ պարող մը, որ հաստատութիւն չունի»,- գրում է նա։ Անկասկած, ազգն արթնացնելու եւ բարձրացնելու համար միանգամայն կարեւոր է սիրտ տալը, ոգեւորելը, «յուսոյ եւ գովութեան» խօսքեր ասելը, բայց նա երբեք էլ կողմնակիցը չէ չափազանցութեան, դատարկ գովեստների, փառաբանութեան։ Ճշմարտութեան շրջանակներից չի կարելի դուրս գալ նոյնիսկ հայրենասիրութեան ու ազգասիրութեան հարցերում²⁸։

Հայրենասիրական երկերի շարքում ուշագրաւ է յատկապէս «Պլպուլն Աւարայրի» պոեմը, որն իր պաթոսով հմայիչ ու խոր ազդեցութիւն է գործել բոլոր ժամանակներում եւ դարձել է հայ ժողովրդի սիրելի գործերից մէկը, ժամանակակիցները հեղինակին տուել են «Աւարայրի սոխակ» մականունը։

Պոեմը սկսում է Աւարայրի դաշտի նկարագրութեամբ։ Սկզբից մինչեւ վերջ ներկայ է հեղինակը՝ որպէս նոր մի Եղիշէ, որ բորբոքում է անկախութեան հուրը։ Աւարայրի դաշտում իր խոհերի հետ շրջում է հայ երգի Նահապետը... Երեւակայութեան բարձունքում յայտնուում են Եղիշէն, Վարդանը սիգապանծ քաջերով... Բռնկում է պատերազմը, արին է կտրում խաղաղաւէտ Տղմուտը, ամպերին են հասնում նետերի շառաչը, ձիերի դոփիւնը, վիրաւորների վայնասունը, բայց կանգնած է Վարդանը, նրա ղեկավարութեամբ առաջ են նետում հայերը՝ նոր հայրենագոհութիւնների։ Ճակատամարտից յետոյ անծայր լուծիւն է, չկայ կենդանի որեւէ շունչ, բայց ահա մթութեան քօղի տակ երեւում է մէկի սրբացած, աստուածային կերպարանքը։ Եղիշէն է՝

²⁷ Բանբեր Երեսանի համալսարանի, 3(105), Երեսան, 2001, էջ 209։

²⁸ Նոյն տեղում, էջ 210-211։

Վարդանանց հերոսամարտի պատմիչն ու երգիչը, որին եւ նկատի է ունեցել հեղինակը իր պոեմին «Պլպուլն Աւարայրի» խորագիրը տալով²⁹:

1848 թ.-ին, երբ հեղափոխութեան ալիքը ցնցեց Իտալիան՝ «աւստրիացիք, հեռացէ՛ք Վենետիկից, թո՛ղ կորչի նուաճողի լուծը, թո՛ղ կեցցէ մարտնչող ժողովուրդը, թո՛ղ ապրի անկախ Իտալիան...», ազատագրական պայքարի տրամագրութիւնների տակ Ալիշանը գրեց հռչակաւոր «Բա՛մ փորոտան»-ը՝ ոգեշնչելով մարտնչողներին. «հապ՛օ՛ն յառա՛ջ»: Ռոմանթիկ գրողը համոզուած էր, որ մի օր էլ ազատութեան ղողանջները իր հայրենիքում կը լսուեն, ուստի ստեղծեց ապագայի քայլերգը: Այն դարերից եկող հայ ոգու կանչն էր որ հարազատ էր ե՛ւ վենետիկեան մարտնչողներին, ե՛ւ անկախութեան համար արին թափող միւս ազգերին. «Ի զէ՛ն ի վրէժ, օ՛ն անդր յառաջ»³⁰: Իր այս շունչով ու թռիչքով էր, որ Ալիշանը հայոց հաւատքի խորան բարձրացրեց եւ աստուածահաճոյ դարձրեց Հայաստանի ու հայկականութեան սէրն ու պաշտամունքը: Նա առանց նիւթական աչքերով Հայաստանը տեսնելու, հոգով տեսաւ ու այցելեց Հայաստանի ամէն մի կէտը, սիրեց, ապրեց ամէն մի հողի կտորը, շնչաւորեց աւերակները, գգուեց, հիացաւ նրանցով, հաւատաց եւ հաւատացրեց՝

Մի ուրանար գերկիրդ եւ զազգդ սիրուն,

*Ծառն արմատով է ծառ՝ պունն հիմամբ է պունն*³¹:

«Իր հատորների եւ մեր հոգիների մէջ վերակերտեց նա Հայաստան աշխարհը եւ պատեց մի վիպական, բանաստեղծական մթնոլորտով՝ գեղեցիկ, հրապուրիչ, առասպելական, բայց եւ իրական: Հայաստանը ո՛չ ոք այնպէս չգիտէ, ինչպէս նա, ո՛չ ոք այնքան չի սիրել, որքան նա, այս մեծ հայրենասէրը: Իրականութիւնը նրա գրչի տակ երազ է դարձել եւ երազը՝ իրականութիւն»³², գրել է Ա. Իսահակեանը:

Յիրաւի, Ալիշանը նորարար-բանաստեղծ է, խոշոր գիտնական, հայրենագիտութեան հիմնադիրն ու նրա մեծավաստակ մշակը, երիտասարդ սերնդի դաստիարակն ու ձեռնհաս խմբագիրը, մարդ որ ինչ-որ չափով իրենով լցրեց 19-րդ դարի ամբողջ հայ կեանքը, եւ իմաստաւորելով իր կեանքի ամէն մի պահը՝ յաւիտենականութիւն ապահովեց իր համար: Նրա ժողովրդայնութեան հիմքը նրա անսահման սէրն էր հայրենիքի ու մարդու նկատմամբ: Նա իր բոլոր գործերում շարունակ հաստատում է աստուածային պատուիրաններին թէ՛ գրչով, թէ՛ գործով հաւատարիմ լինելու գաղափարը:

Կանցնեն ժամանակներ, շատ գործեր կը խամրեն, սակայն Ալիշանի թողած ժառանգութիւնից շատ բան չի կորցնի իր արժէքը: Եւ այս չէ՞ արդեօք մարդ արարածի իրական անմահութիւնը:

ՆԵՐՍԵՏ ԱՐԵՂԱՅ ԱԼՈՅԵԱՆ

²⁹ Տե՛ս Գրիգորեան Վ., 19-րդ դարի հայ գրականութեան պատմութիւն, Ս. Էջմիածին, 2018, էջ 64:

³⁰ Տե՛ս նոյն տեղում, էջ 61:

³¹ Տե՛ս <http://www.aztagdaily.com/archives/416693> (15.11.2020)

³² Իսահակեան Ա., Երկերի ժողովածու վեց հատորով, հ. 5, Երեւան, 1977, էջ 11: